

Atencion grandi den Pueblo relaciona cu:

AWE TIN REUNION DI PARLAMENTO RIBA HURAMENTACION

ORANJESTAD(AAN) Awe mainta pa 10'or y mey e reunion encuanto huramentacion di ministronan lo tuma lugar den Parlamento.

Durante fin di siman tabata tin pamfletanan ta circula na Aruba cu tabata invita pueblo pa masalmente acudi na sala di Parlamento, pa asina di cerca atende e reunion sumamente importante aki pa pais Aruba.

Huramentacion di ministronan y reglanan cu Henny Eman a firma cu Hulanda a lanta un stof nacional y a crea un problema cu a bay para te na Den Haag, Hulanda caminda Consejo di Ministro di Reino mester a bay atende un asunto interno di pais Aruba.

Den e reunion publico aki cu a ser pidi di parti di parlamentarionan di OLA cu sosten di Duke Croes di AVP (mester tin un minimo di tres parlamentario pa pidi un reunion di parlamento) e batata politico y estatal cayente mester worde trata y awe den e reunion publico aki, pueblo lo bay haya sa ta ken ta ken y ken ta para tras di e causa Arubiano y ken ta prefera di para tras di ideologia partidista.

Emocionnan den pueblo ta tenso pasobra mayoria hende ta haya cu e persecucion cu tin contra Glenbert Croes ta nada otro cu un acto di venganza di parti di contrincantenan politico y tambe ta forma partid di e strategia colonialista di Hulanda.

E pamfleta cu tabata circula tabata muestra cu tin grupo den comunidad cu ta harta di loke ta pasando den politica den Reino Hulandes y ta pesey den e pamfleta ta poni: "dialuna tin un reunion publico di parlamento pa 10.30 di mainta cu lo bay dicidi si locual cu Gobernador a haci encuan to nombracion di ministronan pa Aruba ta corecto.

Realidad ta cu nombracion di un ministro pa Aruba no ta asunto di Reino, ni di Gobierno di Hulanda.

Cu e solo hecho cu Gobierno di Hulanda a dicidi di tuma su decision riba e asunto aki ta un metemento directo di politiconan Hulandes den asuntonan interno di pais Aruba y den nos autonomia.

Pakico nos tin nos Status

Aparte anto?

A yega e momento pa nos pueblo para firme y uni y bisa NO na e constante metemento di gobierno di Hulanda den asuntonan cu ta regarda nos pais.

Ban conhuntamente demostra na Politiconan Hulandes cu nos presencia masal den e reunion di parlamento dialuna mainta, cu Aruba ta un pueblo cu ta rechaza locual cu Gobierno di Hulanda a haci.

Bin cu bo bandera di Aruba. Cu bo bandera lo bo demostra di ta un yiu di tera aki cu berdaderamente ta stima bo pais y cu no ta acepta pa un gobierno di Hulanda dicidi pabo cu a vota 12 di december".

E pamfleta ta muestra cu cos a bira hopi serio y cu awe parlamentarionan lo bay sinti e rosea cayente di pueblo den nan nek pasobra ta hopi cara y wowo lo tin dirigi riba tur parlamentario cu awe ta haya nan dia di berdad.